

GOGOETAREN SILABAK!

Ba dakit nik gudua galdu
eta pakea irabazi
gingo duen herri bat.

* * *

Ikus beza bakoitzak zer nahi duen:
hilzorian dagona sendatu
ala hillak piztu.
Edo kandelak saldu entierroan.

* * *

Gure burua eskaxa da.
Bainan nik nahiago dut
neure buru eskaxarekin pobre
besterenakin aberats baino.

* * *

Arrotz sentitu nintzan Suede-n:
kaka esaten diote pastelari.
Euskaldun gelditzea erabaki nuen
derrefente.

* * *

Kafka gizon bat zan.
Oi zer atrebentzia izugarria
herri izan behar dan denporaotan!

* * *

Gizonak ezin du gizon izatearen
kontribuziorik pagatu.
Pobre izan. Filosofo guztiak
joan beharko dute
beren presupuestoak bajatzen.

* * *

Atila filosofo egin zanetik
zaldia logika da.
Rocinante metafisikoa zan.

Lastimarik ez dauka
euskal langilleriak
asto pare bat besterik.

Astoa ez dute oraindik
ideologizatu.

* * *

Platero-k ez zuen
euskerarik ikasi nahi.
Itzuli egin behar izan da.

Bainan arrantza estranjero bat
loratzen zaio gaixoari.

* * *

Atzo mezatara behar zan
derrigor eta gaur derrigor
mezutara. Ni konforme,
mazotara ez dan artean.

* * *

Filosofo danak zeuzkaten bi begi
bekokiaren azpian.
Bainan pentsamentuaren azpian
dioptria gutxiegi.

* * *

Poesia ez da
sustantibo bat kaiolan sartzea.

* * *

Euskaldunak poema bat bada,
asonanteren bat izango naiz ni.

* * *

Ernegaturik dabilta jainko guztiak
olinpo-tik uxatu zituzten ezkeru.

Atseginago baita musa bat
jainko guztiak baino.

* * *

Gunadhya-k bere odolarekin
idatzi zituen poemak.
Bainan poema txar batzuek
irten zitzaizkion.

* * *

Jesukrixto gizon bat omen zan.
Bai, eta hil ta dana egin omen zuen.

* * *

Itzala saldu zion Axular-ek
euskeraren truke deabruari.
Ta guk deabrua erosi nahi dugu
euskeraren truke.

* * *

Egiari kriskitinak nork jarri,
salbatuko da gizona.

* * *

Esan zuen: dana egin leike
baionetekin. Gainean
exeri ez beste dana.

Bainan, progesoa: ba dakit nik
punta punttan exerita dagoen bat.
Punta punttan,
urteak, —eta oraindik ez du kantatu.

Jose Azurmendi

ITXI EGIDAZUE...

Itxi egidazue
neuk gura dodazan izakiak maite izaten.
Ez dot bizi gura gizabidearen jopu;
ez eta,
gizonak egindako legeai lotuta be.
Basoan jaio ta azia naz,
eta,
paparra zabalik eta biotza zabalago,
besutsik,
eta bekokia garbi, gora begiratzeko,
bizi gura dot,
arimea zauritzen dabeen zaratetatik urrun.

Maite dot txilibitu ta arrabiten ots-eztia;
baiña ez, gero,
tximist-kitarren burdiña-zarata durunditsua;
eta gitxiago,
kantari uleluzeen kera ta zirkin emekoiak:
suntsi beitez, gure artetik, emekeriok!